

周

易

恒

解

周易恆解卷二

上海圖書館藏

雙江劉沅註釋

三三

離下
乾上

天在上火炎上而同于天離爲日而又爲火日卽火之精也且天得火而益光明于人則離爲心心以火爲神以乾爲性先天乾位轉爲後天離位人之所以生卽心之所以異也此卦離火上應乎天是人心不昧其本故爲同人蓋人不同而心同心同則天下人皆可同也序卦物不可以終否故受之以同人謂濟否非同不可也

同人于野亨利涉大川利君子貞

同人與人同也離本坤變乾覆坤地與天爲曰野人與天際曰于野乾健行故利涉二五中正君子也乾天也

離虛明人心也乾在離上人心之天也人不同而其心
之天同故欲同人者貴同于野不涉藩籬亦無畛域則
人心之天可以合天下而爲一事無不濟故亨而可以
涉險矣然費其同人者貴其同天理惟君子以正相合
得此卦者利如之若
以私同則非卦義也

象曰同人柔得位得中而應乎乾曰同人同人曰同人于
野亨利涉大川乾行也文明以健中正而應君子正也惟
君子爲能通天下之志

同人大有五剛一柔並以柔爲主何以能同人惟得位
則至正至大得中則無偏無黨應乎乾則以陰從陽以
人合天而無人之弗同矣特言同人曰者明文王不直
云同人而云同人于野之故乾行言惟以乾而行乃畛
域化而可涉險非恃柔以行也以卦德言離文明則能
察理乾剛健則能克己以二五言中正則內無私應則

外無間此皆君子之正道也人心之同然者爲志君子以正通之正者感而通不正者化而通焉往而不大同志

象曰天與火同人君子以類族辨物

後天離位卽先天乾位也天純陽火生于陰而成于陽故天以日爲明以火爲用是以天與火可以言同天上運火上炎不同其物同其性亦猶人與人不同而其道同其趨同也故曰同人君子法乾覆之無私于殊分之族而類聚之于不同者同之也法離之均照于有別之物而辨析之于同者異之也同其所不得不同異其所不得不異所以爲同之大也

初九同人于門无咎

初九陽剛無私六二耦畫虛中門之象九以剛居初欲同人而無偏私與二相近二中而正是可同之人卽在

門也勇于集益剛
直無私故无咎

象曰出門同人又誰咎也

出門卽有同人同心至近又誰咎之誰對三四而言三伏莽四乘墉皆忌人同而欲咎之初與二同則非三四所能咎也

六二同人于宗吝

宗黨也後天之離本先天之乾六二變則成乾其與五相應仍其類也故爲同人于宗象然同人欲其廣不欲其私以類相從則狹矣故吝

象曰同人于宗吝道也

于野爲亨則于宗爲吝吝之道言其道本狹隘而非謂所同之非也

九三伏戎于莽升其高陵三歲不興

離戈兵戎象互巽隱伏又巽爲陰木莽象變艮爲高陵卦惟一陰諸陽皆欲同之三離數也九三剛而不中是剛暴之人與二相比欲與之同然二以中正之道與五相應三以剛強居二五間欲奪而同之理不直而勢又不敵故伏戎于莽心懷不直升高陵以顧望至于三歲之久畏懼終不敢興

象曰伏戎于莽敵剛也三歲不興安行也

敵剛也歎其不自量才而欲與五剛敵故有此舉安行也喜其終不敢發安分而行聖人教人之意深矣

九四乘其墉弗克攻吉

離中虛外圍墉象與解上六變離曰墉同義五陽皆欲同二九三在下卦之上爲二之墉九四在上卦亦欲同于二惡二之比三有陵下之志爲乘墉下攻之象然去二益遠以剛而居柔位故爲不克攻而自反之象能如

是則能改
過矣故吉

象曰乘其墉義弗克也其吉則困而反則也

義者理也困困窮則法則也二居內四居外言乎應則二與五應而四非應言乎比則三與二比而四非比三爲二墉五以剛中應二攻安能克故曰義弗克欲攻不攻兩交戰故困知其弗克困而聽于義則順乎法則矣

九五同人先號咷而後笑大師克相遇

五與二以中正相應同人之正者也因三四間之暫不得同故先號咷然中正相與終不能間也故後笑離爲戈兵乾以剛健應之爲大師象克勝也謂勝三四遇遇六二也

象曰同人之先以中直也大師相遇言相克也

五與二中正相同何以先號咷以五本中直之道不爲隄防詐僞之計而伏莽乘墉三四從中阻之欲同而不

能卽同故號咷也相克言同以中正終非三四所能敵蓋深喜其中直也

上九同人于郊无悔

乾爲郊上居卦外亦郊象國外曰郊郊外曰野郊在野內未至于曠遠同人象之是未能極友善之量者然雖未廣亦無所爭故无悔也

象曰同人于郊志未得也

同人于野則亨而于郊則但无悔者同人以相親相與爲義上九居外而無應是无與同者且郊不若野廣遠是未能通天下之志合四海爲一也故曰志未得

附解人同此心心同此理五倫以正相與共成有情之世界則反否爲泰同人之所以次否也第同人者必有至

公至明至誠至虛之量始能合四海爲一人同人于野
卽是意也六爻皆無全吉故文王開端不第言同人而
言同人于野蓋特揭明同人之義繼之曰利涉大川言
如是則無事不可爲又曰利君子貞言必君子之貞而
後可故孔子申之曰惟君子爲能通天下之志類族辨
物則至公至明至誠至虛該焉是所以通天下之志也
聖人以天下爲一家中國爲一人而情無不孚恩無不
洽者豈非同人于野之意哉于門取善卽于至近故无
咎于宗亦未大失但狹隘則難推行故吝三四伏莽乘

墉始也包藏禍心繼而歸于分義故聖人恕其始而嘉其終五與二中正相遇而不能不待於大師以小人阻之也若非中直豈得遂其同人之志哉同人之志無應而亦無爭特免於悔綜觀六爻之義聖人貴人之同又欲人別同中之異以化異於同故取君子之貞又陳小人之狀莫非所以勉人於中正而已

三三
離上

大有有者大也同人之離在下人心也大有之離在上君心也日光下照庶類繁昌君心下交賢才彙出物之盛與人之盛者君皆有之故爲大有序卦與人同者物必歸焉故受之以大有

大有元亨

陽爲大一陰虛中下賢而衆陽從之蓋居尊不自滿足者乾健離明居尊應天故有元亨之道比亦以九居五而應之者五陰則民庶之象此應之者五陽則賢人之象賢人應之所有孰大于是故元亨

象曰大有柔得尊位大中而上下應之曰大有其德剛健而文明應乎天而時行是以元亨

柔指六五六居五故得尊位五爲中大中能以衆陽之大而用其中也蓋同人一陰在下勢不足以有衆大有一陰在上人皆爲我所有五陽位得中居尊而虛衷下賢是有大中之德者上下謂五陽內剛健則克勝其私外文明則灼見其理火在天上又離本乾體也故曰應乎天時行以尊下賢不恃其有而善用其有是以元亨也

象曰火在天上大有君子以遏惡揚善順天休命

火在天上日麗于天無所不照而長養生成恩無不包是故物之大有天之休明也君子法之雖明無不照而于惡則遏之使歸善于善則揚之使終善所以順天之休命長保其大有也

初九无交害匪咎艱則无咎

離爲戈兵惡人傷害之象居大有之初去離尚遠是无交也而離火剋乾金有來害之象此非初之咎也然以大有之故故來傷害須處以艱難保其大有乃可无咎

象曰大有初九无交害也

初爲下位初九凡民之象富有者禍之招大有而在初九无交亦有害也歎之而欲人艱以免咎

九二大車以載有攸往无咎

乾爲圓爲輪又爲馬大車象三陽上征大車載以攸往之象九二剛中上應六五合羣賢以事一人任重而不專往故无咎不言吉者讓功於五也

象曰大車以載積中不敗也

積積聚陽多之卦皆曰積敗壞也以金遇火必有敗象九二象大車以載而不敗者積陽剛中爲合衆賢以將誠無致敗之理也

九三公用亨于天子小人弗克

亨春秋傳作享謂朝獻也九三居下之上公侯之象剛正而上交當大有之時爲公侯富盛用享于天子之象然不私其所有以奉上貴其乾剛之體得乎正者也若小人無剛正之德而以貢獻致媚則弗克當此戒占者也

象曰公用亨于天子小人害也

公用亨于天子本忠順之事小人則反爲害以其無剛正之德也

九四匪其彭无咎

彭音旁

彭盛貌一陰而有五陽故爲大有四獨近五五之有皆四有也然以剛居柔知君所有非其所有而謙以自居懼以奉上故无咎

象曰匪其彭无咎明辨晷也

晷明貌九四近五五之所有疑爲四有而四能知五之大有匪其所有是明辨甚晷處盛而不自以爲盛贊之也離明之始所以辨而能晷

六五厥孚交如威如吉

居尊而虛中下賢上下相孚其志交契曰交如者上下勢懸疑于不交惟五具中德故有此孚交威五居尊也如形容之詞居尊而虛中孚于無形不嚴而威柔剛兼濟故吉

象曰厥孚交如信以發志也威如之吉易而无備也

誠能動物一人之信足以發上下相孚之志威而曰如者平易無防閑逆億之私而人自信之不怒而威也

上九自天祐之吉无不利

五陽皆爲六五所有九雖在上而全卦陽爻皆其類乾天也離亦乾體也故爲自天祐之象祐助也上九以剛明之德居大有之盛而下順六五是崇高而能信順有德者故自天助之吉无不利也

象曰大有上吉自天祐也

上居大有之極疑乎過亢而上乃吉者以其同衆陽以下順六五合乎天理自天祐也繫詞言履信思乎順又

以尚賢也信謂六五在五上故曰履思順本卦五陽皆順乎六五也尚賢六五虛中以信衆賢上九同衆賢助順于六五爲尚賢之義也

附解有而曰大有之盛也然其有也乃由一陰虛中信乎五陽五陽從之是以德而非以勢也故於有害者戒其艱有攸往者明其積中享天子者戒乎小人匪彭之无咎上九之吉利皆以順乎五之故也至六五能有衆賢則曰信曰易此其所以爲大中而上下應之也凡處大有者不可曉然其義乎至亨亨字古本通用左傳又明作享則必解爲亨者非大有上吉據繫辭而以爲解六

五之義者固非不用繫辭而以爲別有說者亦非也

三三
三三
坤上
艮下

有而不居曰謙艮內止坤外順謙之意地卑下山高大而居其下謙之象以崇高之德而處于卑下謙之意也序卦有大者不可以盈故受之以謙

謙亨君子有終

謙退自處無往不宜故亨乾之上爻交于坤而成艮本卦艮止成謙九三爲成卦之主以其本乾卦之九三故稱君子謙之道惟君子能盡之坤以大終艮成始成終故曰君子有終言惟君子能謙亦惟謙終成其爲君子也

彖曰謙亨天道下濟而光明地道卑而上行天道虧盈而

益謙地道變盈而流謙鬼神害盈而福謙人道惡盈而好謙謙尊而光卑而不可踰君子之終也

濟施也天位乎上而氣則施于下光明者生成萬物化育昭著而不可掩卑地位乎下也上行者地氣上交乎天本卦艮本坤體乾一陽下交之故爲下濟地居上卦故爲上行天下濟謙也而光明則亨矣地卑謙也而上行則亨矣此釋謙之必亨也虧盈益謙以氣言變盈流謙以形言變者傾壞流者流注害福以理言好惡以情言此四句統言天地鬼神人皆好謙釋謙之所以亨也踰過也尊尊人尊而光如天卑卑己卑不可踰如地其始似屈其終必伸君子惟知持謙始終不渝所以爲君子也

象曰地中有山謙君子以裒多益寡稱物平施

地體卑下山高大而在地中外卑下而內蘊高大之象故爲謙裒減也君子平其情以應理減多益寡稱物之

宜而平其施如損山之高
益地之卑以趨于平也

初六謙謙君子用涉大川吉

六柔謙德也初卑下謙位也謙德以處卑位謙而又謙
君子之事雖涉險亦吉平居可知矣九三爲成卦之主
稱君子而此亦稱君子何也三在下卦之上勞而能謙
在上之君子初在下卦之下謙而又謙在下之君子在
上者尊而尤在下者卑而不
可踰所以爲君子之終也

象曰謙謙君子卑以自牧也

牧卽牧牛羊之牧謂馴服也養德
基于至卑初卑位六卑德故云然

六二鳴謙貞吉

變巽爲雞故鳴又中爻震爲善鳴雌雄相應則鳴故以
陰陽唱和寄之于鳴六二與六五皆柔中之德而上下

相應故爲鳴謙貞

吉中正而吉也

象曰鳴謙貞吉中心得也

二五皆中其心相得故謙德合而吉此鳴而得其應者也

九三勞謙君子有終吉

一陽而給五陰之求故勞九三剛正之德宜在上位而止於下勞而能謙者也惟君子克當之良成終君子任勞履謙久而不變故有終而無不吉也

象曰勞謙君子萬民服也

陰爲民衆陰歸之故曰萬民服九三承上接下勞而不伐大臣功高望重不居其勞故曰萬民悅服也

六四无不利撝謙

搗揮同六四柔而得正處坤之下卑順之至者上有謙德之君下有謙德之臣處聖主賢臣間卑順得正是有謙德而上下信之无處不利其搗謙也

象曰无不利搗謙不違則也

則法則聖主賢臣皆有謙德處其間而搗謙是不違乎謙之則也

六五不富以其鄰利用侵伐无不利

陰虛中故不富鄰臣鄰六五居尊而鳴謙勞謙搗謙諸臣輔之可謂富矣然乃不恃其富彌益謙下是君德之盛者占者若得此爻利用侵伐无不利蓋謙德如此人無不感而有不服者必負固不軌之徒故利侵伐言自反無關也

象曰利用侵伐征不服也

征正也。侵伐爭事而惟謙德之君宜之。何哉？蓋君德極盛謙而不服則頑梗太甚。且言此以見六五之謙非一味姑容乃德盛而能謙也。

上六鳴謙利用行師征邑國

九三變震上與之應故亦曰鳴謙。且此爻變艮則亦與九三同兩相唱和故鳴邑國。坤土象謂己私邑之國上六處謙之極知勞謙之美而欲與九三唱和然去三甚遠間於四五兩爻志未達得是極其謙而無同志者極其謙則自反無闕故利用行師無同志則難成大功故利征邑國而已。

象曰鳴謙志未得也可用行師征邑國也

言志未得見所志未遂非鳴謙之過征邑國也歎其功止于此。

附解易抑陰而扶陽惡夫陰之凌陽耳非謂陰之不可用

也故於坤德皆以乾德爲德而曰利永貞若夫陽亦以能用乎陰爲正而不喜其亢蓋陰陽和平乃天地之正也此卦名謙謂地能蘊山亦取山能下地平其亢抑其高而不失於正故六爻全吉乾坤二卦之位罕純吉若此者又坤艮皆土也其德博厚而平人德如之則爲君子聖人以謙望人實乃天地之德本如此也學者若非從克己復禮用功亦不能全其道如卦爻所云可弗勉

歟

☷ 坤下
☳ 震上

豫和也陽氣潛于地中動而發聲通暢生機時之和也
一陽用事五陰從之位之和也順理而動人之和也序
卦有大而能謙必
豫故受之以豫

豫利建侯行師

坤爲衆震其帥也坤爲邦國國人愛戴則立君而民服
大衆同心則師出而有功故利建侯行師屯有震無坤
則第言建侯謙有坤無震則第
言行師此合震坤故兼言之

彖曰豫剛應而志行順以動豫豫順以動故天地如之而
况建侯行師乎天地以順動故日月不過而四時不忒聖
人以順動則刑罰清而民服豫之時義大矣哉

坤爲衆五陰同類爲衆志四以一陽當心腹之爻應衆
陰而震動衆志皆賴以行故曰剛應而志行衆志和樂

而順理以動雖天地之大且如之而况建侯行師不過
人和而已何弗利乎天左旋順也地靜而順天天地順
其常運而動則日月之行無過差而四時序無愆忒民
同此理順聖人順理以順民心而動則刑罰以清教化
而民心悅服故豫者順理和樂之謂天地聖人
皆然時義大矣哉義而言時時中然後精義也

象曰雷出地奮豫先王以作樂崇德殷薦之上帝以配祖

考

震者陽氣奮發德蘊于中發而為聲樂之義坤順而震
發樂之象互坎亦有樂律象陽為德五陰而向一陽崇
德之象帝出乎震故稱上帝中爻艮為門闕坎為隱伏
宗廟祖宗之象殷盛也薦進也陽氣潛于地中及動而
出奮發成聲則陽氣和暢萬物生遂故為豫也先王法
天地之義知人心之德乃天地人所同貫因而作樂萬
物本乎天人本乎祖以樂暢其德音象天地之豫使人
崇德而于是殷薦于上帝帝格其和以殷薦于祖考欲

祖考亦配德于天地皆本乎天地人心自然之豫以通天祖也

初六鳴豫凶

初應震又變震爲決躁善鳴象初與四應四爲豫主近君得權初不中正上下懸絕欲與之應己無可樂而恃其配以爲樂凶之道也

象曰初六鳴豫志窮凶也

豫之爲義以德順動而和初本無德恃四爲援欲相唱和爲樂不求諸己而求諸人其志必窮故致凶也

六二介于石不終日貞吉

介際也特也謂居初六之間互艮有石象介于石謂居其間而操守堅確如石也不終日不久居豫六二處豫樂之時而以中正自守初鳴豫以援四三盱豫以望四二處其間特然自立如石堅確而不易其操不溺于豫

樂不終日而即去如
此守正吉之道也

象曰不終日貞吉以中正也

以中正言其不終日非矯情非戾俗
乃不過乎則而得處豫之中正也

六三盱豫悔遲有悔

盱目上視也變巽爲多白眼故象盱又爲不果故象遲
六三陰居陽位位不中正宜靜以聽命于四待時而從
之若時未至而妄思攀援盱豫則有悔
若時已至而不從其上遲亦有悔也

象曰盱豫有悔位不當也

盱遲皆悔而遲不過失豫而已盱則失己
故專就盱豫釋之位不當以爻義言也

九四由豫大有得勿疑朋盍簪

由從也一陽動而羣陰附之由豫之理以動也以象言
九四震之主萬物莫不由雷以豫以爻言九四陽之動
五陰莫不由陽以豫陽爲大衆陰皆爲一陽所得故曰
大有得四多懼互坎有疑象又互艮止故戒勿疑朋謂
五陰陰以得陽爲朋也盍合也簪以束髮一陽橫貫于
五陰以簪括髮之象九四爲成卦之主由豫而行衆陰
從之大有得人之助占者得之勿以陰多爲疑推誠
行之則朋類自然合聚如盍簪束髮不虞其散漫也

象曰出豫大有得志大行也

一陽統羣陰而豫動大得
羣陰之助其志大行也

六五貞疾恆不死

居中故言貞下卦坤爲腹中爻互坎爲心疾疾象六五
居尊宜豫者也受制于四而不得豫心有病焉常病人
之豫不由己亦病己之豫不得自由也故貞疾然因疾
則戒損其驕淫而益其畏慎恆不死所謂生于憂患者

也

象曰六五貞疾乘剛也恆不死中未亡也

六五居尊貞而有疾者何也以乘九四之剛羣陰皆附之五獨無權故也恆不死者以位中而貞知戒懼也

上六冥豫成有渝无咎

以陰柔居豫之極爲昏冥于豫之象上處豫終故成動極而變故渝也冥豫之事已成幸震體動而能變一日悔悟盡反其所爲則復于無過矣故无咎


象曰冥豫在上何可長也

冥豫已極災咎必至何可長溺而不變乎故渝則无咎也

附解天地氣化以和暢爲美人心亦然但所貴乎豫者天

地之和心德之暢人倫之樂非徒娛耳目悅心志耽溺
爲尙也故聖人於豫卦深明其時義之大而初六鳴豫
卽戒其凶所以遏其惡於始上六成有渝卽許其无咎
所以開其善於終六二不溺於豫九四能合衆人之豫
以爲豫皆美之盱豫之悔希冀非分之豫以爲豫也貞
疾之不死因不豫而深戒懼也然則人之所以處豫者
可知矣惟聖人道合天地以天地和氣順人心之和氣
陰陽調風雨時倫物遂而萬彙昌故作樂崇德薦上帝
而配祖考大鳴其豫學者苟非從事於致中致和亦安

知豫之時義大矣哉



震下
兌上

剛下柔而說之故曰隨少女從長男隨之義也雷動而澤隨之隨之象也以二體言震剛下兌柔上以卦畫言剛爻皆下于柔爻動而說說而動皆隨之義也序卦豫必有隨故受之以隨

隨元亨利貞无咎

不自是而屈己隨人故可大亨然苟不正則爲詭隨故必利于正乃无咎春秋傳穆姜之語得占法矣其所謂四德則非本旨

彖曰隨剛來而下柔動而說隨大亨貞无咎而天下隨時
隨時之義大矣哉

剛震柔兌也內爲來爲下外爲往爲上隨時隨其理之所在而以時處之也隨時處中非精義入神者不能故曰隨時之義大言剛來而下于柔動而人心說之所以名隨也大亨得其正而所往无咎則措諸天下無往不宜天下隨時矣夫隨時處中通變宜民邦家無怨此其義豈不大哉贊其大以爲隨之法也

象曰澤中有雷隨君子以嚮晦入宴息

嚮向同晦昏暮宴安息休也震東方之卦兌西方之卦雷二月動八月息澤中有雷陽氣收斂之候人事與天地相準故君子法之以嚮晦則入而晏息蓋陰陽動靜造化之自然卽人事之當然也

初九官有渝貞吉出門交有功

官得主有權之稱震長子主器官之象初爲震主動而爲隨有渝象二互艮門象隨之爲卦以相隨爲義故其爻皆下隨上不論應與初九陽剛得正本震之主也隨時以動變而隨二二居中正其隨得正爲吉且二與初

近爲出門而卽交
得其人可有功也

象曰官有渝從正吉也出門交有功不失也

二中正故從之得吉不然則失所
隨矣言有功以明不負所隨之意

六二係小子失丈夫

中爻巽爲繩係之象以剛從人謂之隨以柔從人謂之
係隨則公故無失係則私故有失也陽大陰小故陽爻
爲丈夫陰爻爲小子六二中正當隨之時義當隨三然
三不正初得正故有係小子失丈夫象不言凶咎者明
言係失決擇在乎人有如是
之象而不如是行則无害也

象曰係小子弗兼與也

弗兼與者從此則失彼無兩是之
理居位如是是在人之自戒耳

六三係丈夫失小子隨有求得利居貞

丈夫九四小子六二也六三當隨之時義當隨四爲係丈夫而失小子四近君爲大臣隨之而有所求可以得志但四不中正而六三陰柔利子自處以正否則非隨之義矣

象曰係丈夫志舍下也

此爻在下而一意隨四得陽倡陰隨之常故聖人猶嘉其志而以係丈夫象之志舍下不隨初與二也

九四隨有獲貞凶有孚在道以明何咎

陽爻實故有孚震爲大塗道之象互艮輝光明之象九四以剛居上之下爲大臣隨君而得衆人之心爲隨有所獲第大臣義當隨君威則不可擅也恃其隨以有獲雖所隨得正豈不凶哉若至誠以結主知言行皆在於道而以明哲處之何咎

象曰隨有獲其義凶也有孚在道明功也

義凶有凶之理明功言有孚在道要皆明哲之功也蓋明哲則知心不可欺行不可苟所以无咎也

九五孚于嘉吉

嘉善也上爲兌主說以隨時居上無位蓋有德而隱者九五隨之而與相孚是孚于善矣自天子至于庶人隨之道惟在隨善而已故吉

象曰孚于嘉吉位正中也

正中言不下係也當隨之時居尊位而有正中之德故能孚于嘉也

上六拘係之乃從維之王用亨于西山

互艮手爲拘係變乾王象指九五兌爲西伏艮山象上居高位亦山象上六爲兌說之主處隨之極無所隨而

遠舉然德自可隨九五以孚隨之恐其不固則拘係之
又從而維繫之其好賢如此隨之美無有加焉者其占
爲王者尚賢崇德舍己從
人用以亨于西山之象

象曰拘係之上窮也

窮謂居卦之終上六居隨之極無所隨而將遜非九五
拘係之則失賢矣故言上窮也以戒必拘係之乃善

附解卦以相隨爲義隨以時中爲美先儒乃以應與詁六
爻故多失其旨九五上六二爻尤爲鮮當夫卦以剛來
而下柔爲隨初剛下於二柔則九五之剛亦下於上柔
故九五之孚嘉隨上六也上六之係維係維之者九五
所以可係維者自在上六爻從九五取象以其隨故也

賢人嶽降崧生王用亨于西山以其好善之誠克當天
心不負地靈也比卦比之无首凶以其相說而入于不
正此卦以剛下柔相隨以正故曰孚于嘉異于兌之孚
于剝也他說之誤尙多今不悉辨學者但玩本註可也

三三

巽下
艮上

蠱者物久敗壞而蠱生也於文皿蟲爲蠱左氏傳云女
惑男風落山以長女下於少男其情亂矣以卦德言在
上者止息而不動在下者巽順而无違委靡因循積成
敗壞所以蠱也又二體則陽卦居上陰卦居下六位則
剛爻居上柔爻居下陰陽剛柔不相交尊卑上下不相
接百弊生而萬事廢蠱之義也序卦以喜隨人者必有
事故受之以蠱蠱非
訓事蠱乃有事也

蠱元亨利涉大川先甲三日後甲三日

蠱物敗壞而生蠱凡事敗壞而後有事文王恐人以蠱棄之言占得此卦者大亨其利如涉大川蓋事壞亟須治安如大川雖險亦必涉之但濟險扶危需有爲之才耳先甲後甲致其慎重則吉蓋甲木旺于東物之所以生其位爲寅其卦爲泰天地交之時也然氣王于甲而其生機則自壬癸而來至丙丁則生意極盛而陽衰矣先甲三日言治蠱者當審其機於未萌方蠱之時即豫爲救蠱之地後甲三日言治蠱者當察其機於將衰未蠱之時即豫爲防蠱之道也本卦艮居上陽生於嚴冬之時是寅甲生盛之機而艮以止之成一年之歲功即啓二年之春景巽居下陰生於盛暑之時是甲木將盡之兆而巽以動之萬物皆潔齊以相見實萬物皆發洩而無餘先甲三日後甲三日戒占者凡事必豫爲防慎爲備法斯義也言三日者陰陽之氣三而盛盛而衰循環不窮占者遇事審之是所以元亨也

彖曰蠱剛上而柔下巽而止蠱蠱元亨而天下治也利涉大川往有事也先甲三日後甲三日終則有始天行也

剛上而不下交柔下而不從上安於卑巽止而不遷萬事隳頽所以名爲蠱也而文王言元亨者知蠱之可爲不以蠱而棄之則必有見幾之明勘亂之略蠱不終于蠱故曰蠱元亨而天下治也利涉大川非徒冒險以行蓋寔有治蠱之寔功往而有事也先甲三日後甲三日審于其始慎于其終蓋終則有始天道循環之自然占者能法而慎之則吉也

象曰山下有風蠱君子以振民育德

山下有風所謂風落山也山木風摧蠱敗之象振民者振作而維新之象巽風之行于下也育德者涵養而擴充之象艮山之止于上也成己成人皆此義

初六幹父之蠱有子考无咎厲終吉

蘇氏曰器久不用而蠱生曰蠱人久晏溺而疾生日蠱天下久安而弊生日蠱蠱非一日之故也必世而見故爻多以父子言之幹木身也木有幹而後能載枝葉人有才而後能振家聲故曰幹蠱父死曰考厲危也初六陰居陽下當蠱之初壞亂未甚其占爲幹父之蠱則克蓋前愆有子而考亦无咎雖當蠱之時不免危厲然惕慮正所以有成始雖悚惕終則吉也

象曰幹父之蠱意承考也

巽主于順子道亦然而云幹父之蠱者蓋其意主于蓋前愆不必襲父之爲正所以善承考也武周善繼善述以此紹聖之非亦以此

九二幹母之蠱不可貞

六五陰柔處尊母象九二剛而處柔上應六五子幹母
盡象陰性安無事而惡有爲其盡幹之尤難者正之則
傷愛不正則傷義故不可以貞自恃言當異以成之也戒占者如是

象曰幹母之蠱得中道也

九二得巽之中正上應六五故能幹母之蠱得中道卽不可貞之義也惟不恃貞故爲得中

九三幹父之蠱小有悔无大咎

悔以心言因九三過剛則幹蠱之事更張未免太急所以悔也咎以理言巽順得正能制其剛則意主幹蠱非同私意妄行故无咎九三陽剛之才能幹父蠱者第過剛自用不免小有悔而意主幹蠱无大咎也聖人教人欲竝其小悔而亦無之

象曰幹父之蠱终无咎也

人子以成親之美爲孝故孔子許其終无咎以爲天下勸也

六四裕父之蠱往見吝

裕寬裕也強以立事爲幹怠而委事爲裕正相反也六四以陰居陰不能有爲裕父蠱象治蠱如拯焚溺惟恐不及怠緩則蠱日益深以此往治其蠱立見其吝蓋必不可行也

象曰裕父之蠱往未得也

未得未得遂其治蠱之意蓋惜其才不足也

六五幹父之蠱用譽

六五以柔居剛又能得中其幹蠱也善繼善述引咎而歸美于親不彰其父之失而人因子以頌其父故爲用譽此幹蠱之最善者也

象曰幹父用譽承以德也

德善繼善述之事不承以才而承以德乃能不彰父惡光大前人極美之也

上九不事王侯高尚其事

上事事奉下事事體也五居尊故爲王三互震故爲侯上九在其上故爲不事巽爲高艮爲山在上在艮上故象高尚蠱當有事之時家事責之子國事責之臣上高無位故王侯之事有不事者焉夫其不爲王侯之事者蓋有更高于王侯之事者也天下有事蠱有心蠱事蠱在一時心蠱在萬世上以事外之身抱道而處高風介節立懦廉頑不治事蠱而治心蠱不治一時之蠱而治萬世之蠱是以事爲事上以不事爲其事不事之事更高于事其尚之也宜哉

象曰不事王侯志可則也

高尚其事卽孟子言居仁由義尚志之事
非以放情物外爲高尚已也故曰志可則

附解天地無蠱之時人心有蠱之事失其所以承天地之
理而蠱生焉矣聖人以救蠱爲心治蠱爲事故繫之以
元亨象之以幹蠱夫氣運之盛衰人以爲天爲之也而
不知人爲之人心動而失中由無以養其本體之明復
無以察其事理之正也一心之蠱見於一身著於萬事
而事父事君皆不得其正矣然君臣以義合故容有不
遇於時不能成其幹蠱之功者若父子則一家繼述恩
義兩無所逃故聖人就其切近者立論幹父母之蠱如

是卽幹君之蠱視此也惟上九一爻乃就君臣論而以
不事王侯爲言蓋賢人君子憂時憫俗之心卽忠君愛
國之心惟君不之用則志無可展惟有高尚其事然其
高尚也正所以勵一世之人心存萬古之名教而忠愛
之心固未嘗一日忘也故子曰志可則而

欽定述義更能曲暢其說今敬從之至先甲後甲彖傳明
言終則有始天行而先儒穿鑿之過矣又來汪諸人以
艮止於上爲父道尊而無爲之象巽順於下爲子道服
勞承順之象故爻多以父子言義亦可通然無解於六

五一爻也不如東坡之說爲允

三三兌下
坤上

臨莅也大也二陽方長而盛大臨乎四陰故爲臨十二
月之卦也爲卦下兌說上坤順天下之物密近相臨者
莫如地與水故地上有水則爲比澤上有地則爲臨序
卦有事而後可大故受之以臨臨者大也韓康伯曰可
大之業由事而生二陽
方長而盛大故次於蠱

臨元亨利貞至于八月有凶

八月建未之月由復至遯也言占得此卦者大亨蓋自
子一陽生至丑月而陽壯陽氣方盛天運日趨於泰人
事得之爲君子得志之時故大亨也但所以元亨者以
其陽長陰衰理盛欲除占者必利於正乃合天地之義
又恐人恃盛而驕也戒之曰至于八月有凶蓋由于而
至于遯卦之月則二陰又爲主而陽消矣方盛而卽戒

其衰所以長保
其盛之道也

象曰臨剛浸而長說而順剛中而應大亨以正天之道也

至于八月有凶消不久也

浸漸也說而順內說而外順也內說則陽進不逼外順則陰從不逆剛中九二應六五應之天道天生成萬物之道言臨之所以爲名以陽剛浸長而日大也然其體內說外順九二以剛中之德而六五應之六五應則羣陰無不應者剛柔相濟大亨而以正此乃天之道也人事如之其吉豈不大乎故繫曰元亨也然亨不長亨必有否時至于八月有凶所以明陽雖方盛而其消亦不久所以戒乎人之自滿也

象曰澤上有地臨君子以教思无窮容保民无疆

臨者大也地大容澤澤滿等地大之義也君子法之教化斯民至誠惻怛之心无窮與兌澤同其淵深含容保

固斯民无有疆域與坤土同其博大以是相臨臨之至大者也

初九咸臨貞吉

咸感也初陽在下前臨四陰無位而臨人不能強其服也必有所以感之初九剛正感之以正而人心說從故吉

象曰咸臨貞吉志行正也

初九以陽剛之才出以兌說是其志在感人非徒剛也故曰志行正陽健故曰行五震亦爲行

九二咸臨吉无不利

九二上臨四陰而以剛中感之如此臨人於理爲吉於事爲无不利也

象曰咸臨吉无不利未順命也

命謂六五之命六五爲羣陰之主舉五可以該衆陰也九二陽剛而爲兌說之本體故爲咸臨然二與五應者也以陽臨陰乃以說而順感之恐人疑其屈從于陰故釋之曰未順命也言其所以吉无不利乃以剛而得中自能說以感人未嘗順羣陰之命也

六三甘臨无攸利既憂之无咎

三當兌口以言說人故曰甘互震恐懼變乾惕若故憂也柔不中正逼近二陽德不及而位過之以此臨人憂其不服則爲甘言以說之故曰甘臨然其以甘臨也固已自知其不及而憂之矣誠卽其所憂而修德以踐言則无咎戒占者以救過之法也

象曰甘臨位不當也既憂之咎不长也

位不當陰柔不中正也咎不长既憂則必改過非徒憂也

六四至臨无咎

至至其地也四近君大臣之位而六以順臨下下卦兌說上臨又當坤兌之交地澤相比最爲親切上下以順說相臨是至而後臨情無隔閡者也故无咎

象曰至臨无咎位當也

以陰居陰爲位當上近五之君而見信任下應初之賢而信從至而後臨非強服也

六五知臨大君之宜吉

五以柔中下應剛中知九二之賢而任之是不自用而取諸人者有知人之明而臨人大君之宜莫先於此故吉

象曰大君之宜行中之謂也

九二中六五亦中行其中以相應故曰大君之宜若非中而徒以任人爲重則非知臨不得爲宜也

上六敦臨吉无咎

坤土敦厚上六居臨之終爲敦厚以臨人之象以厚待人義當得吉而事必无咎也

象曰敦臨之吉志在內也

內謂內卦內卦兌說上六居臨之極而陰性柔順又坤體敦厚故志在二陽尊而應卑高而從下其意甚厚故也吉

附解臨以盛大爲義物之相臨者惟盛大可以相服下卦兌說感人則以以德臨人立象初二咸臨之吉德盛臨人而人自感也甘臨之无攸利德不足而欲強人之感

也上卦坤順則以以位臨人立象六四之无咎順下情以事君六五之吉任賢臣以得衆上六之吉蓄厚德以從人皆有位而順以臨人也蓋居下以臨人無勢位之尊惟賴德以服人居上以臨人雖有勢位亦必順人情以相孚此聖人教人之至意也舊解以凌逼爲義於各爻取象多不分明今遵夫子臨者大也之意而各就本文釋之其他牽強諸說概不置辨至八月之說諸儒說各不同然卦取陽盛爲義自當從自子至乾陽極陰生之說方合夫子消不久之義所謂八月由復計之也非

文王居殷之世卽改正朔以六月爲八月

三三坤下
巽上

觀者有象以示人而爲人所觀仰也凡觀視于物則爲觀評爲觀于下則爲觀註風行地上徧觸萬類周觀之象也二陽尊而在上爲四陰所觀仰觀之義也序卦物大然後可觀故受之以觀此八月之卦也

觀盥而不薦有孚颙若

觀去聲

卦象巽艮門闕重複有宮觀之象艮手巽潔故象盥艮止故象不薦颙大頭也仰也盥將祭而潔手薦奉酒食以祭言觀之爲義有以示人而爲人所仰也若有心求人之觀則無以觀卦體二陽尊而在上四陰翕然從之象之以觀當如祭祀者誠敬積于中素爲民所信服則不待其以觀示人方盥而不薦之時而有孚存于心下已仰望而尊信有颙若之象也

彖曰大觀在上順而巽中正以觀天下觀盥而不薦有孚
顒若下觀而化也觀天之神道而四時不忒聖人以神道

設教而天下服矣

下觀之觀平聲餘皆去聲

陽大陰小陽上陰下故曰大觀在上順順理巽順民情也大觀統謂二陽中正以觀獨舉九五天道至神故曰神道聖德如天其道亦至神故亦曰神道言卦體陽德爲羣陰所觀瞻正如人君爲羣黎所尊仰爲大觀在上之象坤順巽柔九五中正人君體之順理而巽從民願中正以觀天下以其中正觀天下之不中正而天下潛孚默契於不知觀盥而不薦有孚顒若言下之人觀上所行自然感化也蓋盥薦者文也有孚者誠也誠存於禮文之先卽誠通於未祭之始不特神格而人亦可通所以然者天地人神莫非一誠之所貫注也故觀天之神道曷嘗有言有爲而四時不忒誠爲之也聖人誠身而本天以治民禮樂刑教皆有至誠宰之故以神道設

教而天下服矣不言而信無
爲而成亦何異不薦之孚哉

象曰風行地上觀先王以省方觀民設教

上觀去聲
下觀平聲

省方卽巡狩觀民俗如陳詩納價之類設教因俗
以設教不違乎中正也風行地上無所不至有歷覽周
遍之象坤爲方方之象
巽以申命設教之象

初六童觀小人无咎君子吝

觀平聲

卦以觀示爲義九五爲主也爻以觀瞻爲義皆觀九五
也互艮少男童象初在下居陽亦童象故二居陰取女
象小人下民也陽爲君子陰爲小人初六以陰居下去
五最遠不能觀五中正之德猶童子之識見不遠也其
占在小人則无咎蓋不識不知順帝之
則民之常也若君子亦局於所見則吝

象曰初六童觀小人道也

小人之分原不可責以遠大之
觀而君子之所以吝不待言矣

六二闕觀利女貞

觀平聲

闕窺同互艮門象坤有闔戶之義閉門而觀故曰闕觀
二五正應能觀五者宜莫如二二以陰間不能觀光居
於內以闕外故爲闕觀占者在女子得之亦必利於守
正蓋闕觀非女子之正也故戒之而丈夫得之其象可
知矣

象曰闕觀女貞亦可醜也

可醜謂其不能觀國之光而僅以窺爲事雖貞亦可醜
也况不貞乎然六二得中無不貞之事易爲君子謀以
丈夫望人故于闕觀
雖貞亦以爲可醜

六三觀我生進退

觀平聲

下爻皆觀乎五四觀國之光三爲四隔處坤順之極有可進之時亦有可退之地故爲觀我生進退象我生我生之所行王氏申子曰君子進退當觀乎時今不觀時而觀我生者九五以陽剛中正觀示天下時不待觀但觀吾之所有以爲進退可也

象曰觀我生進退未失道也

當可進可退之時而返己自審則進退可不失道恐人以當觀而不觀爲非故釋之曰未失道夫乘時觀光固君子之志也然六三居下之上居上之下上有已觀光之大臣下有觀而化之小民是可進可退之時觀我生以進退豈至失道哉他卦三不中多不吉惟本卦此爻曰未失道聖人欲人觀光尤恐人務于觀光而不自審也

六四觀國之光利用賓于王

觀平聲

國光國之盛德光輝不言君身而言國者人君以四海
爲家觀國之政化則君德可知矣坤爲國互艮光輝五
爲王九五陽剛中正觀示天下四巽順近之親炙光輝
五待之如賓四乘時有爲故曰觀國之光利用賓于王
象曰觀國之光尙賓也

尙崇尚九五中正以觀天下尊賢尙德禮之如賓故可
觀光言非自居于賓乃君以賓處之也所以戒觀光者
進躁

九五觀我生君子无咎

觀平 君子二字
聲 句下同

我九五自謂觀我生自省有生所行九五爲觀之主羣
陰皆仰觀之而陽剛中正未嘗有意求人之觀惟自觀
我生有君子之行占
者如是則无咎也

象曰觀我生觀民也

下觀
去聲

言其觀我生者正九五之所以爲中正而爲法于天下也觀民卽中正以觀意

上九觀其生君子无咎

其自人言之也上九處觀之極貴而無位然爲衆陰所觀人心所瞻仰故有觀其生之象蓋賢者之責備愈嚴二老繫西周之歸終南譏仕宦之徑故上雖無五之位而人亦必觀其生也君子陽剛與九五同體是誠有君子之德可爲人觀者故无咎

象曰觀其生志未平也

志謂四陰仰觀之志上九陽剛處觀之極雖無權位而實居尊九五已爲觀之主羣陰皆仰之矣而上更居五上人心有未釋然者故觀其生蓋言虛聲之不可盜也

附解自上示下曰觀自下觀上曰觀然下之觀者視乎其

上之觀者何如耳若有心求人之觀務爲觀美而無中正之德又何以成大觀故成卦雖以九五爲主而於下之觀上也惟以六四爲美以其近君而觀光最切也於上之觀下也亦以觀我生觀其生爲象言盡其所以可觀者而後觀示於天下也彖傳兼取九五上九二爻言大觀爻辭於五上二爻皆言君子蓋以其皆陽剛之德爲下所觀也第九五得位則以觀我生爲中正觀天下之道上九高而無位則以人觀其生爲責備賢者之心要無非欲觀示天下者自省其德至下之觀上童觀則

限於識闕觀則蔽於私所以然者以其去君太遠闕於
觀者固陋妄爲觀者亦醜也惟六三審出處六四際有
爲乃許以觀聖人豈強人以觀而不自立乎前人未融
通卦爻故說多牽強

三三
震下
離上

噬齧也嗑合也頤中有物間之齧而後合上下兩陽而
中虛頤之象四一陽間于其中頤中有物之象也爲卦
震下離上物有爲造化之梗者必以刑獄治之噬嗑去
頤中之梗雷電去天地之梗刑獄去天下之梗其義一
也序卦可觀而後有所合故受之以噬嗑

噬嗑亨利用獄

言噬嗑自有亨義事之不通以有間也去其間則通矣此概舉天下事而言利用獄則噬嗑中之一事六五爲治獄之主柔而得中凡治獄之道惟以威與明得中爲貴震有威離有明五柔得中故利用獄也

彖曰頤中有物曰噬嗑噬嗑而亨剛柔分動而明雷電合而章柔得中而上行雖不當位利用獄也

剛柔分者震剛離柔分居內外剛爻與柔爻相間剛柔分而不相雜明辨之象動震也明離也震雷動于下離電明于上合以成文故曰章得中六柔五中上行震動離明皆上行之象於人事爲人君以仁柔居心下情上達雖六五以陰居湯位爲不當而治獄之道則最宜也言頤中有物故名噬嗑物梗則不通噬而得合故亨也卦德剛柔兩分動而文明于天象爲雷電合而成章六五柔得中道而居尊雖不當位利于用獄蓋不柔則失之暴過柔則失之寬柔得中則寬猛得宜有衷齊之心無姑息之過如雷之斷如電之明濟以仁術獄無冤濫

矣

象曰雷電噬嗑先王以明罰敕法

雷震必電電擊必雷無不相合者不曰雷雷而曰雷電者噬之合白下而合上以震陽之動爲先也罰一時所用之法法平日所定之罰明辨也辨其輕重象雷之明勅正也正其得失象雷之威明之勅之使民知畏而已非尙罰也

初九履校滅趾无咎

震爲足在下則趾也校械也震爲木校也履校以足受校如履滅趾沒其趾僅滅趾械小也九居初無位下民之象恃陽剛而不柔順未有不犯刑者然方動之初其惡未甚止惡於初而用刑輕所謂小懲而大戒也故履械僅滅其趾占者知止惡於初則无咎初上無位受刑之人中四爻用刑之人

象曰履校滅趾不行也

趾者人之所以行履校滅趾則不得行爻言无咎而象歎其不行戒人勿以小惡而爲之也

六二噬膚滅鼻无咎

祭有膚鼎蓋肉之柔脆噬而易噎者二重柔去肺遠故爲膚互艮故爲鼻滅鼻深入至滅沒其鼻也六二中正故其所治如噬膚之易因初剛不能卽服不免用刑如噬膚至於滅鼻然罪所當罪无咎也

象曰噬膚滅鼻乘剛也

膚易噬也而何以滅鼻以乘初剛是倔強之人不能不深嚴以治之歎剛之難服非六二中正則幾無以服也

六三噬腊肉遇毒小吝无咎

腊音昔

腊肉之陳久味厚者三在膚裏故爲肉臘日燻之故爲腊毒說文云厚也味厚者爲毒久互坎爲毒故師亦言

毒六三居下之上陰柔不中正治獄而遇多年陳久煩難之事一時艱于斷理如噬腊肉而遇陳久有毒之物故小有所吝然噬之欲其合之无咎也

象曰遇毒位不當也

處位不當謂下之上上之下所噬雖當而德望不足以遠服人非所行有不當也

九四噬乾肺得金矢利艱貞吉

剛居柔肉帶骨故曰肺離火薰之故乾金矢金鏃也離之外爻乾之匡廓也乾金互坎爲矢乾肺難噬九四陽剛臣之位治難治之獄搏豪強治貴近如噬乾肺而肺中又得金矢非可噬者蓋其以剛明治獄獄不難治如噬乾肺而中得金矢則有未可盡以剛服者故利于思艱持正徐而去之則吉

象曰利艱貞吉未光也

九四雖剛正然未能以德服人故不免噬乾肺而得金
矢離本光明居離之初故曰未光知其未光而持以覈
貞則亦無難光也
聖人戒剛之意

六五噬乾肉得黃金貞厲无咎

五質柔故爲肉在離中故乾變乾爲金得坤之中爻故
黃六五柔中居尊治人而人服之且扞誠以獻爲噬乾
肉而噬之又得黃金之象黃金喻人心之堅貞也所以
然者六五柔中噬之以貞又常存危厲之見占者如是
則无
咎也

象曰貞厲无咎得當也

惟貞厲乃得无咎得當
得用刑之當戒六五也

上九何校滅耳凶


卦上爲首離爲科上稿校象何與荷通施校于首故荷之也互坎爲耳又爲耳痛滅耳校厚可知上九過乎尊位偏剛不服乎六五是稔惡而不悛者居至明之世遇雷動之威必有嚴刑故爲荷校滅耳象占者得之必凶也

象曰何校滅耳聰不明也

六五爲噬嗑之主柔中聽治上九無位而居其上偏剛不服是有耳無聰遇明斷而不聞知故得荷校滅耳之凶至于滅耳則雖欲聰而亦無能矣

附解五倫皆以和合爲貴有間之者而乖違之風熾矣正如噬嗑飲食取其融化頤中有物梗而不通必噬之使嗑天下人情亦然聖王以禮樂化天下而有頑梗不順

者必以刑罰治之六爻五君位也爲治獄之主四大臣位也爲治獄之卿三二又其下也爲治獄之吏初下民也止惡於初得以无咎上非民非君偏剛不馴是上有聖明爲惡不悛故其凶特甚盛世之頑讒山澤之狂夫皆其類也夫噬之所以合之明刑所以弼教聖人非尙猛也故治獄者戒其過剛而受罰者欲其改惡無非仁民之心也



離下
艮上

賁飾也山止于上而火發之蒸成文物之盛故曰賁蓋火在天上爲日在地爲火山者地之形高接于天者也

人知日乃陽精而不知中藏陰火卽地之靈也火伏于地其焰上燭于山文明之象故爲賁也序卦物不可以苟合而已故受之以賁則以人事言必相接以文乃能合而不亂也

賁亨小利有攸往

有質不可無文故占得賁者可亨然文以濟質非可專尚也故但小利于所往恐人專驚乎文故戒之也

彖曰賁亨柔來而文剛故亨分剛上而文柔故小利有攸往天文也文明以止人文也觀乎天文以察時變觀乎人文以化成天下

釋賁之所以亨故曰賁亨也柔來離中一陰從坤中爻而來也本乾體而一陰來變爲離文其剛德則不偏于剛故亨分剛上謂上九也乾之中爻變離分此一陽居于艮上而文德盡以柔主之故不若陽剛之大有爲而

但小利有攸往然天道純陽而著爲萬象則賴離火發
生之是柔以濟剛乃天文之道也若夫有文明之美而
止乎其則又人文之道也觀乎天文以察時變而裁成
輔相之事與觀乎人文以化成天下而禮樂文爲之法
詳凡此皆順乎自然而止乎其所當然此二句申文明
以止之義也止乎其則則文不徒文否則但求觀美並
不得爲文矣陽大陰小故曰小利離
明于下艮止于上故曰文明以止

象曰山下有火賁君子以明庶政无敢折獄

山者地之高接于天者火在其下而炎上庶物露生發
越繁盛故爲賁庶政一切政事明庶政如火之無所不
照而萬物長養折獄民命所係非徒文察可了賁之時
君子敷文德以明庶政而折獄則不敢以文正象傳所
謂文明以止者也非謂庶政皆明而折
獄不可亦非謂庶政小而折獄大也

初九賁其趾舍車而徒

卦下爲趾互坎爲車艮止故舍也乘車貴者之事初九居賁之時有剛德而在下二爲賁主初以非應不與之比安於徒行自賁其趾蓋以德義自榮不以外飾爲務者也

象曰舍車而徒義弗乘也

初應四正也從二非正也居于下位剛正自守舍車而徒義本不可乘非故與世之賁相違也

六二賁其須

在頤曰須在口曰髭在頰曰髯須不能以自動附頤而動三在上有頤象二附三故爲須六二柔來而文剛者也柔之文剛非有加于剛之外也文其不及者以成禮陰隨陽而動文附質而行如須附頤而動故曰賁其須也

象曰賁其須與上興也

上謂九三火炎上故象興二陰柔爲賁主實乃與三俱與故能成賁蓋剛爲質柔爲文文不附質焉得爲文聖人右質左文之意也

九三賁如濡如永貞吉

如語助辭又兩端不進之詞濡沾濡也互坎故有濡象九三陽剛有質二陰比而文之故賁如而居離之終極賁之後易陷溺焉故濡如蓋柔能文剛亦能溺質當文之盛持以戒心賁如而又恐其濡如永守剛正則吉也

象曰永貞之吉終莫之陵也

陵侮而上之也九三居離之上永守剛正則柔能文之不能溺之故言終莫之陵蓋深幸其貞也

六四賁如皤如白馬翰如匪寇婚媾

皤白也變巽爲白互震爲鼻足爲的類白馬之象翰馬白色禮記曰商人尙白戎事乘翰互坎寇象初與四爲

月身相角 卷二 三
正應婚媾象六四已入艮體文明將止賁道將變矣故
雖從事文飾而心懷疑懼賁如蟠如相持于文質之間
而未有決也有白馬翰如而來者謂初九也初與四爲
正應來輔以質相須而非相敵共成其賁故曰匪寇婚
媾

象曰六四當位疑也匪寇婚媾終无尤也

當平聲

六四居離之外艮之始文勝質而將變當其位者不得
不疑然有此疑畏則必以質輔文而不自恃其文故與
初九相須而賁匪寇婚媾正以
質來輔文雖始疑而終无尤也

六五賁于邱園束帛芟芟吝終吉

丘園謂在外而近者指上九也艮爲山邱象艮爲果蓏
震爲林木園象變巽爲帛五正爲束爻數五故爲束帛
芟芟淺小意五艮體得中文明以止柔中而密比于上
九之賢賁于邱園之中以求賢士其束帛芟芟然雖似

于吝然禮薄意厚不
過乎文終有吉也

象曰六五之吉有喜也

喜慶也陰陽需而成賁六五與二爲應兩陰不能賁與
上九近而賁之是能求賢自輔以成賁之治者故曰有
喜也

上九白賁无咎

上艮之終止之極也盡去其華歸于無色故白也白非
賁也賁極而反于白以白爲賁正所以善其賁无咎者
返本復始救
敗之道也

象曰白賁无咎上得志也

上得志謂上九當賁之極陽德而止於事
外六五亦從之救弊扶衰得行其志也

附解質與文相資而成賁柔來而文剛以剛過則純乎質
故坤之一陰入於乾中而爲離以文其剛分剛上而文
柔以柔過則弊於文故乾之一陽上居坤末而爲艮以
止其文文質中而賁乃善也然人情易趨於文故聖人
戒之彖曰小利有攸往象曰无敢折獄慎之至也而初
九則曰義弗乘許其不務華二曰與上興勗其能從質
至於莫之陵也永貞吉也婚媾无尤束帛終吉莫非所
以明乎文之必依乎質而雜卦則直曰賁无色也蓋天
文人文皆自然當然之理而聖人品節之以適於中對

質言則曰文自聖人出之則無質非文無文非質蓋法
天地自然之文故以爲无色也凡卦皆從乾坤而生則
柔來剛上主乾坤言者是也又邱氏富國謂陰陽二物
有應者以應而相賁無應者以比而相賁亦深得本卦
六爻取象之意

☷☷☷ 坤下
☶☶☶ 艮上

剝落也五陰盛而逼陽剝落將盡故爲剝九月之卦也
又山本高起于地今乃下附是頽剝之象序卦賁者飾
也致飾然後亨則盡矣故受之以剝
人事日華則本質日漓故亨盡而剝

剝不利有攸往

小人之害君子也。萋菲浸潤使日消月削而不知此卦陰盛陽消。小人害君子之象。故占得者不利有所往也。爲君子謀欲其安坤之順守艮之止晦迹潛身以待時非第遠害也。

彖曰剝剝也柔變剛也不利有攸往小人長也順而止之觀象也君子尙消息盈虛天行也

剝者陽剝也柔變剛者從乎陽之自變而言爲陰所蝕浸淫不自覺以至于剝之將盡一陽僅存亦不能久故不曰柔剝剛而曰變剛也陰小人五陰方盛小人長之象故不利有攸往法坤之順守艮之止占者觀于卦象理當如此申之曰君子尙消息盈虛天行也見無所往者乃天理之當然非私智避害之比也消息者盈虛之方始盈虛者消息之已成天行天道自然之運

象曰山附于地剝上以厚下安宅

山形峙地上根蟠地中言附于地則坳剝矣故爲剝上謂民上一陽在上之象也宅上所居之位民在下爲君之基猶地在下爲山之基居上者厚于民以安其位高而不危與剝者異矣厚如坤安如山也

初六剝牀以足蔑貞凶

以由也此爻變震爲足初在下亦足象一陽而覆五陰有宅象廬象牀象蔑滅貞正也陰之剝陽自下而上初六剝之始剝牀以足象牀以安身足剝則牀不安矣此如小人害正以漸而起必滅其貞占者得之凶也

象曰剝牀以足以滅下也

上者必以下爲基剝牀以足下剝而上亦傾矣以滅下也歎其剝之術毒所以蔑貞而凶也

六二剝牀以辨蔑貞凶

辨牀之面卽平也古平辨字通用尙書平章平秩史記作便索隱曰今文尙書作辨六二陰極盛而上凌居下

卦正位故爲剝牀面象剝足猶陰害之剝辨則明攻之矣蔑貞凶初言其勢此則實有其事也

象曰剝牀以辨未有與也

陰陽比應則爲有與二比初應五前後左右皆陰邪而无有陽爻相輔救故無與言陰何以遂盛極而剝牀以辨由羣陰比應陽未有與而然也歎君子之勢不可孤如此

六三剝之无咎

三亦以陰剝陽故曰剝之然居剛而獨與上應則是處剝之時能去其黨以從陽異乎上下之陰矣占者尙可无咎

象曰剝之无咎失上下也

上下謂四陰三與上九應居羣陰之中而失其助故占者得以无咎也

六四剝牀以膚凶

下坤象牀上艮象人四居上體乃牀上人剝近下之膚爲害深而益近故不曰蔑貞而直曰凶

象曰剝牀以膚切近災也

不早爲計而使陰邪害己剝牀以膚之象則切近之災矣深歎之也

六五貫魚以宮人寵无不利

變巽爲魚爲繩貫魚象五君位陰居之象后變巽長女下體坤宮人象上承陽后妃以宮人受寵于君象六五陰極盛而將消上九一陽居于其上陰不能剝之剝皆自下而上六五柔順居正率羣陰以聽命于一陽爲統衆宮人貫魚次序而受寵占者得之是陰反聽命之時故无不利

象曰以宮人寵终无尤也

以宮人寵疑于陰或盡陽然此爻乃陰極將衰聽命于陽故占者得之可以化陰而終无尤也

上九碩果不食君子得輿小人剝廬

碩大也艮爲果陽爲碩在上獨存不食象坤爲輿下諸陰承以坤輿而一陽得之君子得輿也艮一陽覆于下有象于廬廬所以庇人坤所以庇身上九剝極而陰衰一陽止而不動如碩果不食生意獨存將來生生不窮者賴此也當剝之極羣陰上順乎陽爲君子得輿身安而道可行廬以宅身今屬于陽而不屬于陰是小人失所憑依將藉蔭庇于君子也

象曰君子得輿民所載也小人剝廬終不可用也

民所載者剝極將復民心翼戴君子冀其奠安終不可用者失其所庇而宅身無所前此之剝害君子者至今欲君子之庇廕而一切陰謀無所用自古小人害正于無事之日而欲求庇于有事之時究之國亡家破小人

必不能獨全聖人戒之而歎之然則
爲君子謀亦未如非爲小人謀也

附解凡卦義自下而上者五皆從上本卦亦然聖人爲君
子謀不爲小人謀故全卦皆就君子處剝之時說而前
人无咎无尤或主小人言者非也剝之事自小人爲之
而剝之弊必賴君子救之上九一陽止于衆陰之上陰
欲剝而不能勢已衰數已窮也聖人爲君子謀於其剝
時欲其全身養道以爲將來撥亂反正之機非但欲其
自全然亦未有不自全而可以救世者也孔孟栖皇無
補不能治一時之天下而治萬世之天下然後知碩果

之爲世教賴者大若夫忠孝節義卽或捐身赴難亦維
名教于千秋不得以爲凶咎在常人處事占之進退存
亡皆彷彿是以推亦思過半矣

震下
坤上

復陽復生于下也自五月一陰生至于十月爲純坤之
卦陰陽本相循環陰極而陽復生十一月之卦也序卦
物不可以終盡剝窮
上反下故受之以復

復亨出入无疾朋來无咎反復其道七日來復利有攸往

一陽既生其機莫遏故亨下二句正言其所以亨也天
地之氣化以陽爲主出而長養入而歸藏動靜無端陰
陽無始者一元之理氣周流主宰而不息也聖人難以
顯言聊卽此卦示其機言陽出而施生今也復入而含

于坤土其出也于何而出其入也于何而入一出入
無有疾害之者今既一陽來復則五陰雖衆皆爲之輔
朋來无咎卦象如此安得不亨也反復卽出入之義道
天地之理人得之以承天地者天地人所共由如道路
然故曰道七日陰陽之數各極于六自姤至復凡七月
主陽而言故曰日幽詩一之日二之日古人多呼月爲
日人之始生也與天地會而得其理氣以爲人及其既
生物欲擾之而情不馴離變爲日陽爻主以坤陰心神
內含雜識性不全矣法天地之理而運化其陰陽以合
於道七日來復由反復之後而陽盛陰衰天定理純則
人道亦一天道占者如之何不可利有攸往也不曰天
道而曰天行者天以不息爲體其行也其道也其動也
其靜也復之一言特就其機明之
而豈眞陽有剝時至此而始復哉

彖曰復亨剛反動而以順行是以出入无疾朋來无咎反
復其道七日來復天行也利有攸往剛長也復其見天地

之心乎

反即復也動者陽性順行順其自然之理氣剛長就其
既盛後言見天地之心謂即一陽動處見天地生生之
意未嘗稍息非謂止此是天地之心言復之所以亨者
以陽剛反還本體雖初生而有日盛之勢其云出入无
疾朋來无咎者陽雖主動而施生然乃順乎自然之運
未嘗一毫強爲故一出一入動靜自如陰不能害而適
爲輔即卦體之震動坤順可以得其意矣反復其道七
日來復者陰陽循環分爲二氣實止一元人則不如乎
天法天之行以復還天理則靜而存其未發之中動而
著爲已發之和一如天之七日來復未嘗無陰而陰不
害性定而理純人之道也即天之行也剛長即陽氣充
盛之意觀于復卦其不可以見天地之心乎蓋天心無
息而非從復卦觀之則幾疑純陰之時真無陽矣人心
天理亦未嘗一日亡而非復性之後觀之則幾疑爲惡
之徒真無性矣聖人教人學易反復二句
緊枯利有攸往說不僅言天道舊解失之

象曰雷在地中復先王以至日閉關商旅不行后不省方

至日冬至之日一陽初復當安靜以養微陽故先王使上下安靜以合天地闔戶爲坤一陽承而閉之閉關象震爲大塗坤爲束衆陰爲一陽所止商旅不行象后君也震陽象坤爲方陽安養于下故后不省方聖王立政無非法天地此亦但言其概耳

初九不遠復无祇悔元吉

祇但也至也適也陽動于初復之最先者也在人心則爲不遠之復一念稍非即復于善无大失而至于悔恨占者如是則大吉

象曰不遠之復以脩身也

稍有不善則爲身累于其念之甫動即復于善以之脩身莫吉于此也

六二休復吉

休休休有容也六二虛中比初之賢而能下之人之有善若己有之是能親師取友以成德者故吉

象曰休復之吉以下仁也

仁仁人謂初九以其下仁故吉非但以其柔中也

六三頻復厲无咎

頻數也三居震動之極上接靜坤旋動旋靜復而又復之象人心惟危故厲旋失而能旋復故无咎

象曰頻復之厲義无咎也

不能無失然能旋復義得无咎

六四中行獨復

四在羣陰之中獨與初陽相應是與衆俱行而獨能從善也外不立異中不苟同獨立而不計毀譽禍福故不言吉以堅獨復之志

象曰中行獨復以從道也

道即仁之衆著者二近初能見其心故曰下仁四遠初但循其迹故曰道震爲大塗有道象

六五敦復无悔

六五中德居尊以其虛中能知其失而復之又持以堅固則既復而不再失故无悔坤土敦厚重陰居尊故象復敦

象曰敦復无悔中以自考也

考察也六五虛中而有順德中常自考其得失故復而能敦不至有悔蓋能守之固者故美之也

上六迷復凶有災眚用行師終有大敗以其國君凶至于十年不克征

陰終不返故爲迷迷復迷而不知復位高而遠于仁賢積惡已厚迷而不返故凶災眚又凶之大者也若用以行師終必大敗害其國以及其君至于十年而未已極言迷復之害大也震帥坤衆故象行師坤爲國象震君象十年土之成數

象曰迷復之凶反君道也

君道六五之道本卦以初爻爲復之主自二至四皆以下從初而復爲吉以六五之尊而敦復自考則能從善亦可知上六位高而危迷復不悛與敦復者大相反故宜其凶也

附解伏義取復卦象主天道意多文王周公乃皆引之於

人事孔子兼天道與人事言而曰復其見天地之心乎
蓋合人與天而一之矣陰陽之氣本無終始物之得天
不備則有終始而天地一元之理固未嘗息也復之爲
卦一陽含于地中是動極而靜之時靜極而動之機夫
子曰動而以順行明乎陽之爲用動而無動所以常主
靜也出入无疾朋來无咎本無有動故亦无疾咎第就
氣機之端倪言則姑言出入就卦象言則姑言朋來耳
反復其道七日來復反復者天行之常來復者本卦之
象于來復見天地之心而天心正未始離于反復中也

特自人觀天則以是察之若夫天道之在人亦猶是也
乾孕于坤之中而爲性坤藏于乾之中而爲命後天性
情之所以顛倒而人心之所以惟危也養其純陽之氣
以全天地之理則乾坤各得其所而天地位靜而含乎
一陽動而順乎天則靜中有動動中有靜靜而無靜動
而無動一天心之渾全一天行之自然所謂七日來復
者不在天而在人故利有攸往者不徒占象而當察理
也邵子曰冬至子之半天心無改移一陽初動處萬物
未生時明乎體察天心以是爲端而養其乾元之氣以

爲萬事萬物之本非謂天心止在於此而發育流行獨無天心也反復其道一陰一陽不違乎則故七日來復渾然在中後人以心爲性則但制其有覺之心無以養先天浩然之氣而所謂反復其道者莫得其方卽所謂七日來復者亦但泥於象數耳不知文王以二句明利有攸往之義夫子申之曰天行也剛長也謂法天行而養其浩然陽統乎陰性主乎命天地之性在我可以無往不宜故曰利有攸往也識者參之

三三 震下
乾上

无妄者誠實之名誠實而无虛妄動于理則天矣動于人則欲也本卦乾上震下乾爲天性而震得乾之初爻動而合乎天理故名无妄文王孔子恐人不審于理而但貴无妄故又發明之本體則第主天理言也序卦復則不妄矣故受之以无妄復于天理故无妄是卦之正義也

无妄元亨利貞其匪正有眚不利有攸往

其字指无妄而言言占得无妄者大亨然必利于正其以无妄而動不合乎正則有眚不利于所往蓋无妄者誠之理非但以實心行事而不審乎理也

彖曰无妄剛自外來而爲主于內動而健剛中而應大亨以正天之命也其匪正有眚不利有攸往无妄之往何之矣天命不祐行矣哉

剛乾剛外上卦內下卦爲主爲震動之主得乾體故健剛中九五應同以健動應也大亨以正萬物各得乾健之氣以亨通而不失其正命謂理氣之流行皆由无妄主宰之言卦何以名无妄以天體純陽至剛而震得乾之初爻以成雷動卦上乾下震剛自外來而爲主于內動而能健不失乾性之本然九五以剛中應之天道健行所以流行于萬物而大亨以正者也故占者元亨利其元亨以其正也其匪正有眚不利有攸往則違乎天理恃其无妄欲有所往亦何所之天命旣不祐矣尙能行矣哉彖詞本明故夫子第就本文詠歎而深戒之

象曰天下雷行物與无妄先王以茂對時育萬物

天純陽雷在天之下而載陽氣以行萬物皆各得其氣以生一誠之所發越物物而與以无妄之理所謂天之命也先王聖人之得天德而履天位者茂盛也對與天爲兩也德盛而時行配天之時養育萬物體樂教化皆在其
中矣

初九无妄往吉

初九得乾初爻陽剛誠一之性任天而動
所往無不吉者蓋至誠可以貫萬事也

象曰无妄之往得志也

震動以發育爲心初以
誠一而往故無不得志

六二不耕穫不菑畲則利有攸往

六二柔順得中隨初九陽剛以動而無急躁之心故有
不計功利之象占者如是則利有攸往蓋方耕而望穫
方菑而望畲不惟穫畲之願皆虛竝耕菑之功亦曠矣
震本坤卦得乾之初爻而成震震木臨坤土耕象震爲
稼穡艮爲手穫象初地位二
在地上爲田故取菑畲象

象曰不耕穫未富也

富謂陽之盛入巽則爲富言其所居之位本當未富之時故宜耕不求獲苗不望畚也

六三无妄之災或繫之牛行人之得邑人之災

坤爲牛變離亦爲牛伏坎爲寇盜互巽爲繩繫象震爲足三人位行人象乾爲行人坤土爲邑人六三以柔順而居震動之極恃无妄以往去初已遠上通于乾占者有意外之患故爲无妄之災其象則或繫之牛行人得之而邑人被災雖事非己致然以无妄之故動非其時故有此象也

象曰行人得牛邑人災也

言意外之患往往而然雖動以无妄必審其時故歎之也

九四可貞无咎

九四乾之初爻本无妄者但本卦以震初爻爲動主四以陽居陰位不中正故可貞守其无妄占者如是則无

答

象曰可貞无咎固有之也

四剛而不中然可貞者以无妄者天之性九四乾之初爻于人爲天性之初固有之理故可貞而得无咎也

九五无妄之疾勿藥有喜

互坎爲心病疾象中爻巽木艮石藥象九五乾性之本體陽剛中正而居尊无妄之至者也如是而或有爲之害者爲无妄之疾當靜以待之勿藥自然有喜蓋靜專者乾之本性五居中正動而無動意外之患不足爲患故戒以勿藥人有自返无妄而患出意外者順其自然患當自息勿復用智以生他咎也

象曰无妄之藥不可試也

試少嘗之也无妄本無可藥藥之則反妄而致疾故不可嘗試也

上九无妄行有眚无攸利


乾剛故无妄時窮位極故行則有眚而无攸利乾健行應下卦震爲行動成坎爲有眚

象曰无妄之行窮之災也

時窮勢極恃其无妄以行必有災也此與乾上九亢龍同義故小象傳語亦同

附解无妄者天之實理也爲卦乾健震動以至誠發育萬物故名本無不美第人之占象所以趨吉避凶占得无妄而曰元亨不復審其理之是非則謬矣故聖人曉以匪正有眚若夫六爻皆以无妄爲義則宜皆吉矣而時不同則動靜行止不同苟恃其无妄不擇時而動則有

災疾與眚故无妄之貴貴其以誠尤貴其時中也大象
恐人无妄而不本于天理六爻恐人无妄而不得乎時
宜身心性命之理日用倫常之道本至誠以行時中無
餘蘊矣中庸言至誠孟子言大人不失其赤子之心皆
无妄之義第不可以知覺運動之心爲先天无妄之性
耳先儒泥元亨利貞爲天之四德于匪正有眚及大象
之詞皆不分明識者當細參之又六爻皆无妄无妄之
災意外生患故子歎之說者以爲有妄亦非



乾下
艮上

天在山中所畜至大非如巽以陰畜陽之小也兼畜止畜聚畜養三義天在山中畜聚艮止乾畜止剛上尚賢畜養也序卦有无妄然後可畜故受之以大畜實而不虛乃可積畜故次无妄也

大畜利貞不家食吉利涉大川

乾至大也而爲艮所畜止占者蘊畜其德不爲苟進亦當如之故利于貞固陽爲君子五爲君位六五虛中畜止乾陽尊尚上九之賢是有明君在位占者不家食而祿食可吉又天實非山所能畜止也特養其德以有爲之象故占者可以濟險利涉大川

彖曰大畜剛健篤實輝光日新其德剛上而尚賢能止健大正也不家食吉養賢也利涉大川應乎天也

剛健乾象以內之存主言篤實艮象以外之踐履言艮陽外煥輝光象剛上謂上九尚賢六五虛中從上大正

不自用故大能尊賢故正也養賢以六五有養賢之德
應乎天乾天德也言大畜卦體占者如之則有剛健篤
實輝光日新其德之象彖言利貞者以陽剛居上賢人
之象六五能虛中以尊尚之又能畜止乾健是舍己從
人有廣大之量而不失君人之正者故占者利貞不家
食吉以養賢之君在位也利涉大川占者有乾之德則
應乎天故可大有爲也

象曰天在山中大畜君子以多識前言往行以畜其德

天包乎地非徒在山也第卽卦象言山止天而畜之則
所畜至大識記也德本于天前言往行皆德之所著見
多識而畜之益以養成大德猶
乎天在山而天之益盛也

初九有厲利已

以已音

初九陽剛健進然當大畜之時爲六四所畜止而不得
伸輕進則危故有厲利于止也他卦以相應爲相接此

卦以相應
爲相止畜

象曰有厲利已不犯災也

厲卽災也止而
不往則不犯災

九二輿說輶

乾爲圓錯坤爲輿中爻兌爲毀折脫輶象輶車上伏兔以承輪者二以剛居柔雖健行而能審處乘輿而行中道脫輶暫止不進蓋相時而動寧需勿躁者也大畜初二與小畜同皆不受陰畜故不進然輶與輻異脫輻其脫重車輪散而不能行脫輶其脫微車暫止而旋可行者也

象曰輿說輶中无尤也

九二剛中有中德而
自止故无妄進之尤

周易恒解

卷二

三

九三良馬逐利艱貞日閑輿衛利有攸往

乾爲良馬互震而動故逐也三與上同道引初二以並進如良馬之相逐然四五有阻故利于克艱不可有易心利于貞固不可有速志其艱貞也奈何日閑其輿衛輿所以利行衛所以周身可以濟世亦可以保身則利有攸往也初慮其進二喜其不進三可進又恐其輕進君子之難進也如是夫

象曰利有攸往上合志也

上九無位而尊爲五所尊尚三慎于進則有用世之心而不輕進者上合志上自重之志與之合也

六四童牛之牯元吉

童未角之稱牯施橫木于角端以防其觸此爻變離爲牛艮少故童一陽橫亘于其首牯象也四畜初止之于初如童牛而加牯用力少而成功
易占者得之用以止惡元吉也

象曰六四元吉有喜也

四畜陽于初初安爲所畜
喜者喜其畜之不勞也

六五豮豕之牙吉

震爲決躁故有豕象爾雅云豕子豬豮豮故豮豕與童
牛同義牙繫豕之杙也艮止有木杙象豮豕善走有牙
以繫之則止九二陽剛方盛五以柔中畜之無嚴
法而九二自爲所畜如豮豕之牙禁豕而不豮也

象曰六五之吉有慶也

喜就一己而言慶兼人己而言六五居尊虛中以柔畜
剛九二安爲所畜無相制之嫌而有相容之美故有慶
也

上九何天之衢亨


何與荷通詩曰何天之龍天衢天路也本卦雖取艮止爲畜然六五以陰畜陽實畜之主也上九陽德而居五之上爲五所向象所謂剛上而向賢也當畜賢之時爲五所向主張賢路賢者得志莫盛于斯故曰何天之衢占者亨也

象曰何天之衢道大行也

上九畜極而通何五之寵賢路大通則道無不行故美之也

附解大畜以所畜者大爲義脩身莫大于德治世莫大于養賢本卦四陽皆賢人也下卦取其自畜以自重而不輕進爲美上卦取其畜彼以相畜而無防害爲貴舊解于童牛積豕謂爲止惡夫下卦乾德豈可以惡視之耶

第人君養賢原非一端幼而服習長而教訓涵養之變化之學成而優以祿德大而隆以師保莫非畜養賢士之道也童牛之牯豮豕之牙納之于禮樂詩書之途共安于仁義中正之則故吉而有喜慶爻言童牛豮豕而象但言六四六五有喜慶以二爻爲畜陽之主至何天之衢乃畜極而賢路大通上九一賢爲五所尙而初二三之賢亦畜久而進故道大行經義自明爲衆說所亂學者細味本文必有以知其得失也



震下
艮上

頤口旁也口食物以自養故取養義以卦之二體言雷震于山下根芽發生養之象以上下言上止下動頤頤之象以卦形言上下二陽中含四陰外實內虛頤口之象序卦物畜然後可養故受之以頤物畜聚而無以養之則不能存故次大畜

頤貞吉觀頤自求口實

貞吉得正則吉也本卦大象離目故言觀口實頤中之物本卦內二陰同初陽成動外二陰同上陽成止止者不求動動者不求止既不同德又不取應而合體爲頤故彼此相觀以知其正不正自求口實自考所以養我之口實得正與否孟子曰所以考其善不善者于己取之而已矣卽此意

彖曰頤貞吉養正則吉也觀頤觀其所養也自求口實觀其自養也天地養萬物聖人養賢以及萬民頤之時大矣

哉

釋卦辭而因極贊養之爲道觀其所養之正不正謂上下二陽觀其自養之正不正謂中間四陰陽實陰虛實者養人虛者求人之養本卦頤原從口無養德之意惟養得其正則養德卽在其中矣不但養人自養以至天地聖人養物養民無非養之所在故曰頤之時大矣哉

象曰山下有雷頤君子以慎言語節飲食

帝出乎震萬物得養而成言乎艮萬物得養而成君子慎言語以養其德節飲食以養其體言語飲食動之象慎節止之象此處方說出養德傳元口銘病從口入禍從口出亦斯意

初九舍爾靈龜觀我朵頤凶

大象離故言龜龜陰物而舍陽故能服氣不食此爻一陽伏于羣陰之下故象龜喻性分之樂也初九陽德居

卑無養人之位而足以自養因震動爲頤與四應動其口腹之欲爲舍己靈龜觀人朵頤之象爾謂初我謂四因其動而慕外故設爲四語初之詞朵垂也芻豢說口不如義理可以說心故凶

象曰觀我朵頤亦不足貴也

爻言其凶此言不足貴蓋以理斷之欲人知良貴也

六二顛頤拂經于丘頤征凶

顛頂也謂上卦也拂違悖意邱高阜謂上九本卦四陰皆以求養于同體之陽爲正六二陰柔不能自養求養于人舍初九而上求上九爲顛頤周公言其拂頤之正道而往邱頤以求養征必有凶也

象曰六二征凶行失類也

震爲行言六二之所以征凶以其陰柔妄動求養于人舍初九而求上九上非己之類也

六三拂頤貞凶十年勿用无攸利

諸爻皆以求養于同體爲義六三陰柔居震動之極拂養之道不求養于初而求養于上上雖正應然爲口腹而求之雖貞亦凶占者得之當戒妄動十年勿用以其無攸利也中爻互坤故象十年

象曰十年勿用道大悖也

養道以靜爲主妄動求人大悖頤之正道故戒以十年勿用來氏曰口容止故下三爻養于動者皆凶上三爻養于止者者皆吉

六四顛頤吉虎視眈眈其欲逐逐无咎

顛頂也四與上爲同體故求養而吉上九本乾體故象虎眈眈視近而志專也六四當頤養之時求養于上有顛頤之象自求其類故吉蓋上九以養人爲志居高而下賢如虎視眈眈志甚專一而六四求養之志正切其

欲逐逐不患其不合故无咎此二句申明所以吉也六四連下卦震動而來故逐逐

象曰顛頤之吉上施光也

施及也上九以養人爲心四以同體而求之故受其光而吉言上施光者明有養我之心而後求之非妄求者也

六五拂經居貞吉不可涉大川

六五居尊能自養者也但陰柔不正无養人之才而待養于上以君待養于臣似拂其養之常理然養賢及民君道之正故教占者順以從上守此正道則吉但不可自用而妄有作爲如涉大川也

象曰居貞之吉順以從上也

互坤順變巽亦順順以從上從上九之賢以養天下所謂養賢以及萬民也

上九由頤厲吉利涉大川

由從也上九以陽剛居上位天下之養皆從上九養之厲者君知而順我恐其權尊而逼民仰望于我恐其恩膏不逮心懷危懼也如此存心則吉可以濟險而無不濟矣

象曰由頤厲吉大有慶也

君民皆待養于己故言大有慶慶其得君志行非徒自喜也

附解卦象頤以其上止下動然養道以靜而守正爲主故下卦動而求養爲營口腹之私者上卦止而求養養人皆得義理之正者且初上皆陽可以養人然初無位而上位尊六五亦順從之是賢而得君者苟能養人以輔

治九吉故象美之曰大有慶夫物非養不能生也况于人乎然養體有義匪正而求養則爲飲食之人養賢有方匪正而待養則有覆餗之凶故聖人以陽爲主九以陽之得位者爲主至于養德之義則但于初九一爻象以靈龜蓋靈龜服氣而生人身天性之良如之養性者無取乎膏粱養身者豈徇于嗜欲舍靈龜而觀彘頤孟子所謂以口腹之害爲心害者也聖人知天下之不可無養而又慮人失養之正故于象象詳爲示焉然則養人與自養者可以瞭然矣然而自古及今爲養之故辱

己而求人挾養之權尊己而傲物卒之所養非賢自養者失身而養人者亦不得其力豈非此卦不明之故哉

三三 巽下兌上

大者陽也大過陽過于陰也澤本潤木而乃至滅木則大過矣四陽之卦亦多惟此相聚居中而過盛故名大過大者過過之大與大事過也聖賢道德功業大過於人非有過於理也非常所見故謂之大過序卦頤者養也不養則不可動故受之以大過

大過棟橈利有攸往亨

屋脊曰棟以承椽瓦者也木曲曰橈本末弱而棟不正故曰橈大象似坎二中直棟象兩陰上下象坎之險陷與矯輮又卦上缺下斷皆橈象以理論之本弱則无所承末弱則无所附故象棟橈然陽雖過而二五得中內

巽外說道實可行故利有攸往而亨棟
橈者卦象利往而亨者卦之德與才也

彖曰大過大者過也棟橈本末弱也剛過而中巽而說行
利有攸往乃亨大過之時大矣哉

大過者陽之過也在人事則凡大者皆是非一端也本
謂初末謂上弱謂陰柔四陽聚于中故曰剛過中者二
五內外卦之中三四全卦之中巽而說行內巽而外以
說行也體質剛毅本足發奮有爲而又能用之以中德
性巽順本足深入義理而又能行之以和所以利有攸
往惟利往是以亨不如此則不亨故曰乃亨大過之時
非時大過人當大過之時也立非常之大事與不世之
大功成絕俗之大德皆是非其時或有其時而無其德
與才皆不得
藉曰于大過

象曰澤滅木大過君子以獨立不懼遯世无悶

上一句大過之象下二句大過之行不懼兼窮達言守理至精不苟同世俗也无悶道足自樂不以世莫知而含闕此非有大過人之才德不能也獨立象巽木无闕象兌說

初六藉用白茅无咎

藉承也位在下上承四剛故曰藉巽陰木茅象又爲白茅象爲事之始必須敬慎然後免咎况當大過之時其事至重尤不易爲初六陰居巽體之下慎而又慎如物不措地而藉之且必藉以茅之白者過于慎矣然慎于事始執柔處下不犯乎剛于此而過其誰咎之

象曰藉用白茅柔在下也

柔在下以剛在上也以是而過慎過所以无咎也

九二枯楊生梯老夫得其女妻无不利

木生于澤下者楊獨多楊乃木之弱者二五近本末之弱故皆象楊曰枯者大過于時之義梯木葉也二爻陰在下故言生梯梯者下之根生也五爻陰在上故言生華華者上之枝生也生梯則生意不息故曰過以相與生華則生意將竭故曰何可久下卦錯震長男故象老夫老夫已娶之夫也應兌少女故象女妻女妻者未嫁之女九二陽剛得中當大過之時而應于少女取諸物有枯陽生稊取諸身有老夫得其女妻之象終成生育之功故无不利老夫而女妻雖過平常然陰陽相與以成生育之功過而不過故无不利當大過之時老陽得少陰則剛不過于剛而相與以成事可例觀也

象曰老夫女妻過以相與也

老陽而應少女雖若大過然陰陽相與以有成故无不利也

九三棟橈凶

三四二爻居卦之中棟象也居大過之時成大過人之事必剛柔相濟九三以剛居剛不勝重任故象棟撓而凶

象曰棟撓之凶不可以有輔也

剛強之過而不能取于人人亦不能親輔之歎其不可深爲剛復自用者戒也

九四棟隆吉有它吝

隆高起貌屋以棟爲中故三四皆有棟象而三撓四隆者三以剛居剛太剛則折四以剛居柔權重心下又三在下四在上三于下卦爲上實下虛四于上卦爲上實下實也四乃大臣之位以柔濟剛能肩大事故象棟隆而吉然其吉也謂其近君任大過之事有大過人之才若舍五而下應初六是爲有它則吝矣

象曰棟隆之吉不撓乎下也

不燒曲以就下而一意當君之大事
故吉而有它之所以吝亦可知矣

九五枯楊生華老婦得其士夫无咎无譽

九五兌錯艮少男士夫之象士夫未娶者也應爻巽爲
長女故象老婦老婦已嫁而老者也餘見九二爻下九
五以陽剛應過時之長女故爲枯楊生華老婦得其士
夫之象陰從陽故不曰士夫得而曰老婦得以陰求陽
非陽之咎故无咎然亦非
配合之美也安得有譽哉

象曰枯楊生華何可久也老婦士夫亦可醜也

過時而將衰苟爲一時之遇合故不久而可醜凡
當大過之時欲成大過之功而所與非人皆類此

上六過涉滅頂凶无咎

兌澤而至其極過涉之象變乾爲首而此爻在上頂象
澤水在首過涉滅頂之象當大過已極之時勇于必濟

有冒險過涉而滅其頂之象故
凶然殺身成仁于義爲无咎也

象曰過涉之凶不可咎也

无咎者上六本无咎也不可咎者人不得而咎之也以
人事論過涉之凶雖不量其淺深以取禍然有死難之
節而无苟免之差論其心不論其功
論是非不論利害人惡得而咎之

附解大過本爲陽過若復以陽居陽則愈過故諸爻以陽
居陰者皆吉以陽居陽者皆凶與大壯諸爻取義略同
然大過者謂大過之時大過之事功大過之才德非可
以一端限也故象傳贊其時大而六爻雜取諸象初無
一例藉用白茅過于居心敬慎枯楊生梯過于情誼相

與此皆過而不嫌其過者也棟橈過于自恃棟隆過于任事以其位斷吉凶占者必自擇焉枯楊生華時已過而猶強爲歡過涉滅頂事已過而必欲求濟爲兒女之私情則可醜爲天下之公義則无咎聖人設象以示人可謂曲盡矣夫理惟中道大過非過因常人所不及而似過君子則行其時中而已獨立不懼遯世无悶此豈非脩身樂道之常何所過者而人不能然則以爲過推至于堯舜禪讓湯武放伐孔子作春秋孟子好辯皆曰過也而其實非過也非仁熟而義精亦惡知大過之時

大哉



坎下
坎上

坎陷也一陽陷于二陰之中坎陷之義乾坤爲老父母而乾交于坤坤中孕乾則爲坎坎水也水行于地中實來于天上天施而地所以生也于人則身中有性陰中含陽爲義理之心所寓本卦上下皆坎以象言爲重險序卦物不可以終過故受之以坎過極而陷故次大過也

習坎有孚維心亨行有尚

習重也又便習之義坎本先天坤體孕眞陽于中而天氣行于地矣人秉天之理氣得之陽者爲性得之陰者爲命陽交于陰而命中有性性轉爲情心之所以不正事之所以多險也此卦上下皆坎重重險閉人心狹于形質蔽于私欲正以陽陷于陰之故聖人獨加習字以此卦重坎是天地所以交而氣質所以陷溺天良習于

坎而不能復性常人之所以流蕩而忘返習于坎而保其天良君子之所以立命而修身有孚誠實維語助詞心亨性得其正故心善其用也行行事向上達言此卦重坎占者有孚而得乎理之正則心乃爲性而得亨通行事有日新月盛之美也

象曰習坎重險也水流而不盈行險而不失其信維心亨乃以剛中也行有尚往有功也天險不可升也地險山川丘陵也王公設險以守其國險之時用大矣哉

習卽重字之義重險歎之也天交于地而坤中孕乾萬物之精浮而爲水人心稟天之良其氣則天地之所以合其理則天之所以主也天不能以有陽而無陰人心不能有理而無欲此天之所無如何也聖人補造化之憾以復性望人欲人得其剛中之理而返乎純乾之性故卽水以示人流而不盈謂流行各足而無泛濫理之

卽物而各如其分者視此也行險而不失其信謂經歷
幽阻而卒達四海氣之充周而無間斷者視此也剛中
中爻眞陽維心亨由有孚而得眞陽之義故但釋心亨
而不釋有孚也往有功心亨則事無不成也天之險以
氣地之險以形王公設險守國則人爲也天地之理充
周流行曷嘗有險形氣則居然險也王公體天養民何
必恃險不得已而然因險而轉得其平險曷足爲累哉
聖人欲人化形氣之拘而全剛中之性故曰險之時用
大矣哉險非大用險者因時
之義大此所以爲習坎也

象曰水洊至習坎君子以常德行習教事

洊流相續也德行德之行教事教之事始終如一日常
一再不已曰習言坎爲水水何以習蓋水之至也循序
不息而成其險故曰習坎君子象之常其德行習乎
教事學而不厭誨人不倦如水洊至此習坎之實也

初六習坎入于坎窞凶

宥坎中之小坎初六陰柔居下位習爲險難之事而不以剛正自守機智日甚險亦日深爲入于坎宮其凶必矣

象曰習坎入坎失道凶也

習坎何以入坎以其陰柔失正道也

九二坎有險求小得

陽陷陰中二陰附之甚固故坎而有險然九二剛居柔位不遽求出險實未嘗爲險所困第從容觀變求小者之得不急求成大功也

象曰求小得未出中也

剛中宜可大有爲而求小得者以未出險中義當如此也

六三來之坎坎險且枕入于坎窞勿用

之往也上下皆坎故曰坎坎中爻互震木艮止枕象六三履重險之間來則下入于坎往則上入于坎其險甚矣占者宜靜以俟時且枕險而居入于坎窞切勿用也妄動者致險六三位險而性柔故戒以且枕勿用

象曰來之坎坎終无功也

處坎以出險爲功終无功言動不能出徒益之險故且枕勿用

六四樽酒簋贰用缶納約自牖終无咎

四變互離巽巽爲木離中虛樽象坎水酒象震爲竹簋竹器缶五器所以盛酒漿亦可節樂約繩也變巽爲繩在牆曰牖在壁曰牕二至五中虛牖象出險之道必剛柔相濟四大臣近君之位九五剛德能出險而下求四六四以柔居柔上親于君君臣相求去繁文而就樞華一樽之酒貳簋之食用缶爲樂禮質而情敬如納約自

艮雖險未能出而彼此已通終得濟險而無咎也

象曰樽酒簋二剛柔際也

儉薄之物可以通情由剛柔相際皆求出險故情通而交可固也

九五坎不盈祇既平无咎

盈滿祇適也險生于自滿水流而不盈不必高于坎適與坎平則无坎矣九五剛中在險中而不自滿足如坎水不盈適得其平險者悉化故无咎

象曰坎不盈中未大也

九五陽居尊位宜可大有爲而曰坎不盈者以方在坎中陽德尙未光大故當以不盈處之乃可平險也

上六係用徽纆寘于叢棘二歲不得凶

係縛也。微纏皆索名。三股曰微，二股曰纏。坎黑色變巽，爲繩微纏象。寘置也。囚禁之意。坎爲堅，多心棘也。重坎叢棘也。上居險極，陰柔不正，象爲係用微纏。寘于叢棘三歲而不得其出險之道，罪戾日深凶也。周官司圜收教罷民能改者，上罪三年而舍其不能改而出圜土者殺。

象曰：上六失道凶三歲也。

道濟險之道，歎其自取欲其早求出險也。

附解：乾坤生六子，長少男女皆得乾坤偏體。惟坎離得乾坤正體，而坎又乾宮真陽所寓，故坎爲中男，位北爲水。水流行於天地之間，無乎不到。風雲雷雨皆挾水火之氣，而水九天精萬物所以生成也。人秉乾坤之精氣，獨

靈於物其性則天之心其命則坤之氣乾交於坤而成坎一點純陽真性蔽于形質故心中之陰氣難除卽義理之天良難保惟天下至誠爲能盡其性盡其性者化其氣質之私復其純一之性本卦所謂剛中也習坎而有孚所以全剛中之性而不爲形氣所拘維心亨行有尙心純乎性故行當于理而往有功可必也六十四卦惟此指心示人章氏漢謂一陽陷于二陰之內所謂道心惟微是也彖象略示人以機緘六爻則第以險爲象以天地之藏固不可盡洩也剛中者中存剛正而不偏

任乎剛初六上六皆陰柔故皆失道而凶二五皆剛中故小得无咎六三陰居陽位亦有剛柔意故教以且枕勿用六四與九五際剛柔相求故獨佳夫險非人所樂居也然天地未嘗無險人事尤多有險惟恃有剛中之德則戒懼慎獨操心慮患履險而得其平此聖人教人習坎之意也象詞明以樽酒簋二爲句而晁氏以貳用缶爲句非貳簋而曰簋貳倒詞耳坎不盈祇旣平言不盈而適得其平水之象然濟險者亦然前人何多謬說三歲不得周官所謂不能改者不得卽失道聖人于險

之初卽戒其失道險之終尤欲其得道所以拯民之意

至矣

三三

離上
離下

離麗也明也一陰附麗于上下之陽中虛明之象也火外陽而內陰陰必待陽而明故爲離火無常形麗物而明序卦坎者陷也陷必有所麗故受之以離謂陷于中而欲出則必有所附麗而後能坎內陽而外陰性之含也離內陰而外陽情之著也明暗互代陰陽相需夫子第就次序之意言之非本卦正義也

離利貞亨畜牝牛吉

占得離者利于貞則亨通蓋陰麗陽以成其明陽光外發必內含貞德始不盡用其明而其明可久其象如畜牝牛則吉蓋牝非牡敵也然牝牛健而馴實牝牛之所自出含剛健于柔順人之韜光孕德如之則與卦體相

合故吉也離中之陰
本坤體故象牝牛

象曰離麗也日月麗乎天百穀草木麗乎土重明以麗乎
正乃化成天下柔麗乎中正故亨是以畜牝牛吉也

離以一柔附于兩剛之間附麗而離然成文故曰麗也
天地之氣陰以含光陽以發洩然其體用相資即文質
相麗如日月麗乎天而明無不照百穀草木麗乎土而
象无不呈天地非日月百物則无文然日月百物非麗
乎天地亦無以成其美盛也卦體重明二陰皆麗于二
陽是所麗者正人能如之則得乎文明之正乃可以化
成天下也象詞之所以言亨正以二柔麗乎四陽之中
得其中正不自用其明而其明愈著故亨是以畜牝牛
吉也日月四句極贊離之
義柔麗以下乃釋象詞也

象曰明兩作離大人以繼明照于四方

作起也。火炎上，故曰作上。離下離明，照兩並而作附麗，以成文明。故曰離大人，大德之人在下，則聖人在上，則王者繼明。繼天之明，照于四方，無地不明。蓋其明德如天內含章而外發育，故能繼天以照天下也。

初九履錯然敬之无咎

履行也。錯交錯。初在下，變艮爲徑路，故象履。然語助詞。在卦之初，日出之離也。朝日初出，羣動交作，故履錯然。言事雜亂也。然心爲事主，且氣方清，道心宜守敬，以束心使長保其明，則无咎。

象曰履錯之敬以辟咎也

辟避也。又除也。人心之動如火之始，然朝日之方升，平旦之氣未遠，履紛錯之事而敬以直之，所以辟咎也。深美其敬之善。

六二黃離元吉

二在卦中曰中之離也以其得中本坤土故曰黃離所謂柔麗乎中正也備中正之德以坤貞葆其乾元可以無所不宜故元吉

象曰黃離元吉得中道也

中道天地之正道天地之文盛矣然其美在中蘊于不窮六二得之故元吉也

九三曰昃之離不鼓缶而歌則大耋之嗟凶

三在卦上曰昃之離也離中虛本坤土故象缶八十曰耋坤數八三離陽以離之正體言故從坤數取象日之有昃人之有老常也明德之人身老而神明不衰九三居日昃之時素未能明其德欲及時行樂則鼓缶而歌憂死期將至則大耋之嗟不如彼則如此不明而爲物役哀樂無常凶可知矣苟能緝熙于光明則不知老之將至何非履哀樂之有故曰天壽不貳脩身以俟之所以立命也

象曰日昃之離何可久也

日昃則明將盡德昏則人不久矣
歌嗟歎皆非可久之道故凶也

九四突如其來如焚如死如棄如

如形容之詞剛在昃後日入明息之時九四剛餒不正
前無所因後無所襲如火突起餒餒方來然五以柔居
尊四不能犯之三火炎已甚四又不能禁之不戢其暴
必至于焚焚而死死而棄聖人深戒剛暴之流而極其
禍如此

象曰突如其來如无所容也

卦以養德繼明爲美四當兩火相繼之際剛而不中見
逼于三見棄于五故有焚死棄之凶无所容非人不容
自失其所以容之道也凡人剛忿私心類此俗謂無明
業火無明不明業罪也夫子言辨惑而曰一朝之忿卽

此意
歟

六五出涕沱若戚嗟若吉

沱涕下垂貌離爲目重火炎上薰目故涕錯坎爲加憂故象戚中爻兌口故象嗟六五居重明之上火性炎上重離薰蒸其象爲目被火而出涕沱若面被火而戚嗟若夫火取其明明惡其太盛六五明之盛矣不戒則焚處此位者果能持以憂懼之心如出涕沱若戚嗟若則方且避炎畏熱之不暇而暇自恃其明乎故占者若是則吉蓋六五以柔居尊故善用其明如此

象曰六五之吉離王公也

離音麗

以六居五不恃其明而懷憂懼乃王公之德所以能繼明照四方也五本王公之位不患不明患過用其明故言離之者當如此

上九王用出征有嘉折首獲匪其醜无咎

離爲甲冑爲戈兵故象出征兵猶火也故夏官掌之嘉美也折首折其魁首醜類也離火戒猛故不用剛而用柔然道非一端如上九之剛明及遠王者亦可用之以出征蓋禁暴止亂有嘉之道也但當折首而不獲其醜類如書所謂織厥渠魁脅從罔治則猛而不殘無用剛之咎矣五乃君位此爻云王用出征者上九本乾剛之體且命將出師卽是王用也

象曰王用出征以正邦也

征之爲言正也離象城郭故曰邦言王用出征非驥武也但取殘伐暴正其邦耳蓋聖人惟恐人驥武而云然

附解離于八卦爲日爲火日卽火之精也水火爲天地之

精金木卽水火之神土則中氣之運四象者也人秉天

地之靈而生卽秉水火以爲精神神藏于心心之靈神
之妙也心有人心道心以心本火精地二生火天七成
之內陰而外陽質所以滯精神遂不能純一也聖人者
有覺之心統于虛靈之性性定而情爲之使情皆得中
由性無駁雜也故離卦二陽乾體其中一陰坤也陰爲
主而陽反居外故人心易昏而難明在天地則火之中
凝者水水之中凝者火故坎離分用日月互形而功化
以成未嘗爲天地之病在人心則木液流而難制邪火
妄而易行心之發于私者恆多當于理者恆少故離中

之陰私不除天理之純全不復夫子言克己復禮卽克去此陰邪以清其源而由中達外當于天則也六子乾坤所化而坎離獨得中氣故羲圖乾南坤北而文圖離南坎北日月不運行天地無以爲功化人心不合天身世無以爲事功然乾坤交而坎離分天地之所以生生而不窮坎離合而天地泰乾坤之所以一元而不已在天地則有分有合實無合無分在人物則分者難合合者竟分故復性之功非體天地之撰而通神明之德無以全性也然此理至祕前聖罕言故于卦明示其機而

爻象別爲之說利貞亨畜牝牛吉火本無質有所麗而
炎生心本無形有所麗而神發所麗者不可不正麗于
理則正而明明則通故亨麗于欲則邪而昏昏則塞塞
則窒不亨矣此以心之萌動省察而言坤爲子母牛牝
牛則所以孕陽也離中一陰本坤人心靜而存養專氣
致柔以坤之順馴伏陽光安敦之意止于中黃以是爲
畜牝牛象此則靜存之理也蓋後天之離本先天之乾
而後天之坎卽先天之坤坤以藏之乾以君之此天地
之性也人性何獨不然乾性寓于坤命靜專而後動直

若以有形者言則不過詁爲順德而已然聖人意無不包學者最當審之二五皆柔麗乎中正而或以爲專指二言則非八卦惟乾坤總稱行健地勢其餘六子皆以上下重卦言之需坎云洊皆取連續相因風曰隨山曰兼澤曰麗皆各以其體言若火之爲用相得而益輝煌繼續而彌光大兩離竝作附麗之盛莫有逾于斯者故曰明兩作離舊說亦殊未醒大人兼德位言各爻舊多誤解茲已見于正文不再贅